

**DIREKCIJA ZA CIVILNO ZRAKOPLOVSTVO
BOSNE I HERCEGOVINE****1388**

Na osnovu čl. 16. i 61. stav (2) Zakona o upravi ("Službeni glasnik BiH", br. 32/02, 102/09 i 72/17), čl. 14. i 103. stav (5) Zakona o zrakoplovstvu Bosne i Hercegovine ("Službeni glasnik BiH", br. 39/09 i 25/18) i Odluke o uspostavljanju Programa sigurnosti civilnog zrakoplovstva Bosne i Hercegovine ("Službeni glasnik BiH", broj 32/24), a u vezi sa tačkom 8.3 Programa sigurnosti civilnog zrakoplovstva Bosne i Hercegovine ("Službeni glasnik BiH", broj 32/24), generalni direktor Direkcije za civilno zrakoplovstvo Bosne i Hercegovine donosi

**ODLUKU
O KOMITETU ZA SIGURNOST AERODROMA
U BOSNI I HERCEGOVINI**

Član 1.
(Predmet)

Ovom odlukom utvrđuje se sastav, način i obim djelovanja u redovnim uvjetima Komiteta za sigurnost aerodroma u Bosni i Hercegovini (u daljem tekstu: Komitet).

Član 2.
(Upotreba roda)

Svi izrazi u ovoj odluci dati u jednom gramatičkom rodu odnose se bez diskriminacije i na muškarce i na žene.

Član 3.
(Cilj i uspostavljanje Komiteta)

- (1) Cilj uspostavljanja Komiteta za sigurnost aerodroma je koordinacija aktivnosti na provođenju mjera sigurnosti utvrđenih Odlukom o uspostavljanju Programa sigurnosti civilnog zrakoplovstva Bosne i Hercegovine ("Službeni glasnik BiH", broj 32/24) i propisima iz oblasti zrakoplovne sigurnosti (aviation security) koje donosi Direkcija za civilno zrakoplovstvo Bosne i Hercegovine (u daljem tekstu: BHDCA).
- (2) U skladu sa tačkom 8.3. Programa sigurnosti civilnog zrakoplovstva Bosne i Hercegovine ("Službeni glasnik BiH", broj 32/24), odluku o uspostavljanju Komiteta za sigurnost aerodroma, kao zasebnog tijela operatora aerodroma, donosi direktor operatora aerodroma.
- (3) Odlukom iz stava (2) ovog člana propisuje se saradnja Komiteta sa institucijama i organima nadležnim za postupanje u kriznim situacijama uzrokovanim aktima nezakonitog ometanja.

Član 4.
(Obim djelovanja Komiteta)

Obim djelovanja Komiteta obuhvata:

- a) praćenje kontinuirane efikasnosti mjera sigurnosti aerodroma na osnovu analize procjene prijetnji i procjene rizika, nedavnih događaja i rezultata provjere kvaliteta;
- b) koordinaciju mjera, aktivnosti i rješenja, razmatranje operativnih pitanja i problematike u vezi sa provođenjem redovnih mjera sigurnosti, pojačanih mjera sigurnosti i djelovanja u kriznim situacijama;
- c) nadgledanje i praćenje primjene programa sigurnosti aerodroma, programa kontrole kvaliteta i programa

osposobljavanja i njegovo usklađivanje sa Programom sigurnosti civilnog zrakoplovstva Bosne i Hercegovine ("Službeni glasnik BiH", broj 32/24) i važećim propisima;

- d) davanje preporuka za unapređenje sigurnosnih mjera i procedura;
- e) utvrđivanje vrste i učestalosti održavanja vježbi za djelovanje u kriznim situacijama na osnovu procjene iz tačke a) ovog člana;
- f) osiguravanje primjene programa osposobljavanja iz sigurnosti civilnog zrakoplovstva za zaposlene svih relevantnih subjekata na aerodromu;
- g) osiguravanje da planovi za proširenje aerodroma uključuju planove za modifikacije sistema kontrole i opreme na aerodromu.

Član 5.
(Sastav Komiteta)

- (1) Komitet za sigurnost aerodroma čine:
 - a) direktor operatora aerodroma ili lice koje on ovlasti, predsjedavajući;
 - b) komandir nadležne jedinice Granične policije aerodroma ili lice on koje ovlasti, zamjenik predsjedavajućeg;
 - c) rukovoditelj organizacijske jedinice za sigurnost civilnog zrakoplovstva aerodroma, sekretar;
 - d) ovlašteni predstavnik nadležne carinske ispostave Uprave za indirektno-neizravno oporezivanje Bosne i Hercegovine, član;
 - e) načelnik službe kontrole zračnog prometa i ovlašteni predstavnik pružatelja usluga u zračnoj plovidbi Bosne i Hercegovine iz oblasti sigurnosti upravljanja zračnom plovidbom (ATM Security), članovi;
 - f) rukovoditelj spasilačko-vatrogasne službe aerodroma i/ili ovlašteni predstavnik, član;
 - g) predstavnik službe hitne medicinske pomoći aerodroma, član;
 - h) komandant nadležne vojne jedinice stacionirane na aerodromu i/ili ovlašteni predstavnik, član;
 - i) ovlašteni predstavnik Komiteta aerodromskih korisnika, član;
 - j) ovlašteni predstavnik Komiteta za olakšice na aerodromu, član;
 - k) ovlašteni predstavnik Komiteta za sigurnost letenja (Safety) na aerodromu, član;
 - l) ovlašteni predstavnik domaćeg zračnog operatora stacioniranog na aerodromu, ukoliko je primjenjivo, član; i
 - m) komandant Jedinice za specijalnu podršku Državne agencije za istrage i zaštitu (SIPA) i/ili ovlašteni predstavnik, član.
- (2) Sastav Komiteta iz stava (1) ovog člana ne ograničava da se u ovom sastavu nađu i drugi subjekti, u skladu sa operativnim potrebama aerodroma.

Član 6.
(Način rada Komiteta)

- (1) Način rada Komiteta uređuje se Poslovnikom o radu Komiteta za sigurnost aerodroma.
- (2) Poslovnikom o radu Komiteta za sigurnost aerodroma utvrđuju se prava i obaveze članova Komiteta, način rada i odlučivanja i učestalost održavanja redovnih sastanaka Komiteta.
- (3) Komitet u roku od 60 dana od dana uspostavljanja donosi svoj Poslovnik o radu.
- (4) Broj redovnih sastanaka Komiteta utvrđuje operator aerodroma, na osnovu vlastite procjene i operativnih

potreba, ali taj broj ne može biti manji od četiri redovna sastanka u toku jedne kalendarske godine.

- (5) Operator aerodroma može, po potrebi, sazivati vanredne sastanke Komiteta.
- (6) Način rada Komiteta u kriznim situacijama izazvanim aktima nezakonitog ometanja, u skladu sa tačkom 8.3. Programa sigurnosti civilnog zrakoplovstva Bosne i Hercegovine ("Službeni glasnik BiH", broj 32/24), operator aerodroma utvrđuje u saradnji sa nadležnom jedinicom Granične policije Bosne i Hercegovine i drugim institucijama i organima nadležnim za postupanje.
- (7) Na sastancima Komiteta vodi se zapisnik.
- (8) Bliže odredbe o načinu rada i odlučivanja Komiteta uređuju se Poslovnikom o radu Komiteta za sigurnost aerodroma.

Član 7.

(Izvještavanje)

Operator aerodroma dužan je BHDCA dostaviti kopiju usvojenog i potpisanog zapisnika iz člana 5. stav (7) ove odluke najkasnije sedam dana od dana održavanja sastanka Komiteta.

Član 8.

(Realizacija Odluke)

- (1) Za realizaciju ove odluke zadužuju se operatori aerodroma u Bosni i Hercegovini.
- (2) Za praćenje realizacije ove odluke zadužuje se BHDCA.

Član 9.

(Stupanje na snagu)

Ova odluka stupa na snagu osmog dana od dana objavljivanja u "Službenom glasniku BiH".

Broj 1-3-02-2-915-9/24

12. decembra 2024. godine
Banja Luka

Generalni direktor
Zorislav Ivanović